

續雲南通志稿

冊

三

續雲南通志稿

卷首之三

上諭

嘉慶元年十月乙酉

諭軍機大臣勒保奏途次面詢威遠辦事道府稱牛肩山猺匪因前此兵練進攻未及圍困兜捕復竄往西大黑山該處山深箐密人迹罕到並恐竄入緬甯景東邊界及南縣猛迺等處糾煽生事更難著手惟有趕蒞威遠設法籌辦等語所奏未免隱躍其詞殊屬非是此等猺黑俱屬徼外野夷散居各處並無頭目非如湖南之苗也不過因一時乏食搶掠近邊夷民村莊原不值大辦勒保到彼後止須曉諭各夷莊互相保守如猺黑復敢潛來搶掠即可幫同剿殺設各村人數較少卽於山外要隘地方酌派官兵防守則猺匪等見有防備自不敢復行出山滋事並將土司差兵酌加

獎賞令其回巢仍探聽湖南勦捕苗匪及貴州青溪教匪情形如
尚需伊前往會辦卽順道先赴貴州上緊趕辦以除餘孽而靖地
方再赴湖南未遲如青溪教匪業經馮光熊珠隆阿勦淨而石柳
鄧已經就獲勒保於布置防範猺黑後卽可回省辦理地方事務
不必再駐威遠致猺黑疑畏別生事端方爲妥善

四年四月壬戌

諭雲貴總督富綱萬里之外民情穀價所恃者惟此片紙奏報耳
如再不實皆汝等蒙蔽之咎也慎之

四年八月己酉

諭內閣富綱奏雲南石屏州等處地震情形現在勘辦撫恤一摺
此次石屏州及聯界之建水縣兩處地震猝被災傷房屋坍塌人
口聞有傷斃殊堪憐憫該督見已派員酌帶銀兩前往查明分別
振恤並因石屏向未設有大汛另派將備前往彈壓稽查所辦俱

是除查明坍塌倒房間傷斃人口及城垣衙署監獄倉廩照例查辦外該督等惟當董率所屬實力妥辦加意撫綏毋致一夫失所以副朕軫念災黎至意

四年十二月丁未

諭本日召見顏檢將雲南抱母恩耕等井被水一事詳細詢問據稱嘉慶元年六月內因雨水稍多山水驟發以致二井咸被衝淹雖人口未有損傷而鹽塊多有浸失衙署房間亦多衝塌嘗經稟請勘辦巡撫江蘭以雲南向不辦災遂謂被水不重未經特行具奏並將撫恤銀兩不准開銷辦理過刻等語雲南雖係邊遠省分而地方民瘼總屬一體抱母恩耕二井既經被水衝淹自應據實查明妥爲經理何得以該省向不辦災爲詞隱匿不辦卽云該處並未損傷人口但彼時竈戶不能照常煎鹽因未經報災致有墮欠在井官已不免追賠而竈戶等尤爲苦累是江蘭諱飾之咎實

所難辭著交部嚴加議處以爲封疆大吏玩視災務者戒

四年十二月乙巳

諭軍機大臣富綱奏官兵克復霧龍山等處村寨及酌籌分兵進剿情形一摺覽奏俱悉已於摺內批示猓黑等在霧龍山屯聚經官兵進剿賊匪退入深林將各處草房自行燒燬富綱摺內旣稱殲斃賊人無數而割獲首級何以僅止十餘顆奏報不實卽此可見此次猓黑滋事之初若差令明幹員弁前往該處曉以利害令猓黑頭人將滋事爲首之犯如和尚銅登等縛獻正法原可就事完事卽如姜晟辦理湖南苗匪一事未曾打仗祇係傳集苗弁詳悉開導卽將首犯吳陳受擒縛餘苗俱安靜回寨猓黑之事何難照此辦理乃烏大經率行帶兵往捕而富綱亦紛紛調遣多兵以致猓黑肆行抗拒不能解散且總漕任內得受餽送銀兩獲罪有所風聞故將猓黑一案張大其事希冀將功抵罪亦未可定此時

既已用兵事難中止前已降旨令書麟前往威遠督辦該督到彼後務當酌量情形若猥黑見大兵雲集震懾軍威不敢仍前抗拒書麟即可趁其畏懼之時勒令將滋事首犯縛獻正法其所占土司猛猛地方概行退出不敢再犯邊界即可完案原不必深入窮追盡殲醜類也至富綱摺內所稱土司西北未從猥匪之村寨可以派練從征繞出賊營之後以圖恢復及另片奏將來官兵進至猛猛城其後路俱係西北土司地方毫無顧慮等語談何容易行軍後路關繫緊要並閱所進圖內由打雀山至猛猛城道路綿長何能繞出賊營之後且此等土司所屬番民反覆靡常或爲猥黑勾結聽其指使豈可深信焉有防備官兵後路全仗土司之理書麟於此一節亦當留心妥辦不可稍存大意

五年閏四月乙卯

諭軍機大臣書麟奏日來降猥等隨同各委員安插降寨清查地

畝按繳器械頗爲出力其銅登銅金俱情願出具遵依甘結悔罪
投誠懇請寬其一綫並曉諭銅登等安分焚修等語所辦甚是從
前猛猛滋事係李文明起意勾結銅登既未前來卽銅金被李文
明邀請念經亦尙無主謀情事今已悔罪具結又何必繩之以法
卽令銅登等遵照所出之結在本處焚修毋許過肆蒜江地界其
江岸南所安設土練常川駐守務須嚴密防範書麟仍當選派明
幹土司往諭銅登等安分守法勿得再滋事端其南扎賀扎等處
如有生事之徒卽著伊等出首儻隱匿不報一經查出惟銅登等
是問並諭令猛猛孟連耿馬車里各土司隨時查察銅登等如稍
有反側立卽按捕以靜猺夷而安邊陲爲要

六年三月癸卯

諭內閣琅玕等奏查明滇省社倉存欠各數酌請分別追賠減除
一摺滇省各屬社倉至嘉慶四年額貯穀麥菽青稞等共計六十

萬五千四百四十石零見在實貯及賠解各項共抵除穀三十二萬四千九十石零尙缺穀麥苡二十八萬一千三百四十九石零著照該督撫所請將經理不善之地方官各按銀數勒限嚴追儻逾限不完著照雜項錢糧例參辦至從前辦理兵差民間津貼安家一項以民捐之穀還充民用著加恩准其於冊內據實減除毋庸另行籌補

七年二月丙寅

諭軍機大臣據琅玕奏維西廳屬獐獐夷人糾眾滋擾親往查辦一摺維西地方向來夷民雜處今恆乍綳膽敢執持器械糾眾生事並聲稱欲燒搶古刹康普二寨方可甘心似係挾有夙嫌近於讐殺但該匪夷等既敢抗拒官兵四出焚劫則是有意滋擾非僅止與古刹康普挾讐已可概見自應嚴加懲辦此等雖不過烏合夷匪然業已聚至三四千人若僅空言曉諭令其獻出首逆恐未

必卽行擒獻且亦不足示懲應卽加以兵威使知震懾見據該督奏稱提鎮等聞報後業已帶兵七八百名前往堵剿琅玕亦派撥藤牌兵二百名卽馳赴該處查辦但所帶兵力似尙不敷儻賊多兵少未能卽時得手轉恐賊勢漸張琅玕當於附近營汛內再行添調兵丁督率將弁奮力勦殺俟該匪畏懼窮蹙再諭令將首犯縛獻餘黨畏罪投誠自更易於完結惟在該督相機妥辦以速爲要琅玕到邊後著查明實在起釁緣由並將近日殺賊得勝情形迅卽馳奏

七年四月丙辰

諭軍機大臣琅玕奏派兵各處按剿獠匪肅清後路夥黨以備進剿一摺此次琅玕探得維西附近勦散之賊一半由山後潛赴康普與恆乍綳腊者布二逆助惡拒守一半折回樹苗吉尾一路乘空燒搶當經飭令永明宋錡等帶領兵勇擊殺多人其山內藏匿

之賊亦經日逐按捕後路可漸肅清所辦尙好惟恆乍綳腊者布
二人盤踞康普恃險負隅並勾結江內江外獐獐蔓延滋擾情罪
重大必當上緊勦辦此時該二逆隨從不過二千餘人琅玕一俟
續調之兵齊集後卽當分路進攻務將恆乍綳腊者布二人擒戮
以快人心而靖邊圉至其餘附和夷人及各寨中伏而未動者據
摺內稱近因屢被官兵勦殺已知恆乍綳從前不怕鎗礮之言盡
屬虛誑大半逃散且有曾經順賊之獐獐各寨潛出投營情
願助力殺賊等語琅玕正當趁此機會設法解散並廣爲曉諭以
恆乍綳腊者布二人糾眾肆擾罪在不赦爾等俱係邊境夷民自
應各安生業何苦聽從該逆煽誘自取滅亡現在維西附從夷人
經官兵節次勦殺甚多是恆乍綳不怕鎗礮之言虛誑已見將來
大兵進勦指日殄除爾等玉石不分噬臍何及不如及早悔悟保
全身家如能助力殺賊或擒獻首逆必當奏明重加恩賞似此剴

切曉諭不但現在從逆之人可以解散並附近夷寨有伏而未動者亦可自消反側至所稱狝獠夷人喃珠將家存米麪牛羊呈送軍營謝勞被賊匪搶去並將喃珠細縛經官兵救出賞給銀牌以示鼓勵等語夷人喃珠因官兵在彼駐防心存感激將食物謝勞兵丁致被賊匪搶擾其悃忱實屬可嘉琅玕僅賞給銀牌不足以示獎勵喃珠著賞給金頂藍翎又賊匪頭目念谷帶同家施腊泥興黑苴三人前往拖頂夷寨糾約入夥經該處夷人假意順從款留酒飯密報官兵將念谷等拏獲殊屬可嘉亦應優加獎賞著琅玕查明出力夷人一二名賞給頂帶藍翎總之此等夷人見利易動如能自行解散或竟有殺賊立功者該督卽當一面奏聞一面賞給翎頂俾知踴躍儻仍怙惡不悛則當痛加剿殺使之知所畏懼如此恩威並濟庶可易於集事至片片奏維西現辦軍務請自后鼓站作爲出口卽照出口之例辦理一節向來軍需則例口內

口外各有一定章程若實係內地地方僅以村寨稀少山路崎嶇難於供運爲詞卽欲照出口之例辦理此端一開外省偶有用兵之處皆將援以爲例此時若交部議部臣必照例指駁况該省跬步皆山又何以分別口內口外乎所奏不可行琅玕惟當將獐獐夷匪趕緊勦竣俟將來報銷時據實聲明候朕揆度情形再行覈辦可也

諭軍機大臣據琅玕奏江外夷匪竄入威遠廳屬搶掠滋擾一摺從前猓黑滋事時節經官兵勦撫兼施籌辦完結此次復敢糾合匪眾二三千人在威遠之猛撤江踰淺偷渡肆行焚掠經總兵書成等帶兵追捕逃出江外者有千餘人尙有千餘人潛匿巖洞窺伺應卽上緊勦辦提督烏大經著卽速赴普洱一帶統領弁兵將江內竄擾之賊痛加勦殺俾夷匪等知所懲創其業經逃出江外之賊自不值動勞師旅深入窮追至訊據獲賊供出賊首楊金羅

小二兩名想係漢奸從中主使實爲可惡亟須設法擒獲或卽曉諭猺夷等將賊首及早獻出免致株連更可迅速集事烏大經馳赴該處總須於瘴氣未盛以前趕緊籌辦剋日蕝事綏靜邊陲一有捷音該提督卽自行由驛具奏以慰厘注

七年七月丁丑

諭軍機大臣琅玕奏樹苗通甸小川各路官兵連獲勝仗見在合兵進剿吉尾覽奏俱悉猺夷匪經此懲創自必畏懼惟恆乍綳一犯逃匿江外伊係起事首逆必當擒拏務獲勿令漏網至摺內稱秋深瘴退如有仍須勦辦之處再行奏辦該匪等見已逃出江外若秋深後竟敢渡江滋擾自應勦辦儻畏懼不出卽可不煩師旅夷人賦性兇頑劫掠是其長技遇有滋事之時自當隨案懲創至旣經懾伏之後卽兵力有餘亦斷無將此種夷人誅戮務盡之理窮兵黷武本非善政亦何忍殘害無知之夷人邀功見好耶琅

玕當查明爲首之楊金羅小二實在下落懾以兵威勒令該夷人速將二犯縛獻即可完事無庸過江搜勦務欲邀功至不可罷兵之時轉成蛇足矣

八年四月壬申

諭軍機大臣據琅玕奏緬甸土司孟幹稟懇將腊蚌咱襲職一節覺布幹既附緬甸則腊蚌咱應否承襲土職應聽該國自行查辦其覺布幹送伊國王禮物尤與天朝毫無關涉何須該土司稟知况據稱腊蚌咱逃赴京城奏明大皇帝賞給印信轉回原籍之語查明並無其事其捏飾已屬顯然至該土司稟內有伊國有事卽行具稟天朝天朝如有應辦之事祈賞示知等語尤不成話該國係化外蠻夷如有應辦之事天朝既不必與聞至天朝政事豈有傳播外夷俾共聞知之理看來自係該國與暹羅構釁因見暹羅勢強思欲藉以乞援天朝助其聲勢乃作此隱躍之詞冀爲地步

殊屬狡詐且暹羅臣事天朝極爲恭順揆諸柔遠字小之義亦不應干與其事琅玕惟應札諭駁飭以杜其續行瀆稟亦不必提及該國與暹羅構釁之事若不喻其意者然並將原稟及覺布幹與緬甸原文一併發還方爲得體至伊致送象牙孔雀尾自應發還琅玕業經賞給緞疋足矣

八年四月壬申

諭軍機大臣琅玕奏江外夷人圍拏首逆擒戮賊黨各情形一摺據稱隴戛一帶夷人攜家乞投共二百數十名口願將家口留營作質男丁仍回江外截拏首逆當經琅玕派撥夷勇帶同前往兜圍連次斃賊數十人擒獲恆乍綳妻母及妻弟二名並有老幼男婦百餘人哀籲乞投亦經量給口糧全行放回見據恆乍綳妻母供稱願將二子畱質伊單身過江找尋伊女密爲商酌設法辦理等語所辦甚好且據稱該逆攜帶多人向不裹積糧食惟仗各寨

隨時供應今經琅玕密諭各寨令於該逆就食時乘機縛獻看來該逆勢極窮蹙自可卽就俘擒琅玕當迅速妥辦俟恆乍縹就擒後卽將該逆凌遲處死在彼梟示俾江內江外夷人共知儆懼卽可完案其擒獲該逆之夷人自當從重獎賞或奏請賞給頂帶以示鼓勵至恆乍縹之妻及妻母妻弟等本例應緣坐之犯但旣據該夷婦供稱本係江內獐獐被恆乍縹硬將伊女奪占爲妻以致棄家失業儻該夷婦母女果能將恆乍縹設法獻出或別經擒獲後訊明該逆妻室實係奪占卽當將夷婦及子女等一併釋回俾免株累其江外夷人等琅玕仍當出示曉諭以爾等本係向化夷人特因恆乍縹蠱惑滋事爲所愚弄今官兵已將首逆擒獲正法其餘概不株連前此逃出乞投之百餘人均經量給口食加恩釋回爾等嗣後當各安生業勉爲善良以承天朝恩澤如此明白開導並一面加以撫恤該夷眾等自必心知感激安分守法則邊陲

可以永靖

八年六月辛卯

諭軍機大臣永保奏馳抵普洱查辦事件三摺覽奏俱悉據稱刀永和因係舊宣慰之子不得承襲見又不能干與宣慰事務心懷不平設計誘令刀太昌等過江戕害復焚燒車里宣慰司房屋肆行搶劫等語是曲在刀永和自應嚴拏懲辦今永保等以刀永和見已遠逃江外藏匿若派官兵捕拏轉恐聞風遁竄經酌派道府各員前赴思茅向土目召齋翁等面爲開導鼓勵令其設法購擒所見甚是該撫卽飭令諭知召齋翁如果能設法將刀永和擒獻所有猛籠土弁一缺卽當奏請將召齋翁頂補自必踴躍從事易於弋獲也又據稱孟連土司刀派功素性貪酷因僧人銅金引誘三猛五圈之人向其布施心懷嫉妬卽以銅金爭奪占踞具稟至僧人銅金據稱伊自歸順以後尙屬安靜並無不法劣跡其占踞